



PAHAYAGAN NG PARTIDO KOMUNISTA NG PILIPINAS  
PINAPATNUBAYAN NG  
MARXISMO-LENINISMO-MAOISMO

# Bayan

Special Issue

May 8, 2001

**Padayon nga pabaskugon ang  
mga rebolusyonaryo kag progresibong pwersa!  
labanse ang mga paghimakas sang pumuluyo  
samtang padayon nga ginabatuan ang mga padihot  
sang kampong Estrada!**

**M**adasig ang paglupok sang mapuslanon nga mga hitabo sini nga naulihi nga mga adlaw: gin-aresto si Estrada sadtong Abril 25 matapos siya nga pasakaan sang kasong dalagkuan nga pagpangawat kag iban pa nga kasong kriminal; gintipon sang kampong Estrada ang daku nga pwersa sa EDSA sini nga naulihi nga semana sang Abril; ginsugod sa Malakanyang ang mga pwersa nga ini sini nga Mayo 1; kag gilayon gingamit sang kampong Macapagal-Arroyo ang kahigayunan nga ini agud maglunsar sang balos-salakay sa kabanggi nga kampong Estrada.

Ara sa likod sang mga ini ang mga madason: ang nalab-ot sang pag-abanse sang mga pagpamatuk sang pumuluyo sa napalayas nga grupong Estrada, ang paglala kag paglab-ot sa hayag nga kalakasan sang bungguanay sa tunga sang grupo nga Estrada kag sang rehimeng kampong Macapagal-Arroyo, kag ang temporaryo nga pagpangibabaw subong sang ulihi. Labi nga nagtampok sa natungdan nga mga hitabo ang kabug-aton sang problema sa kaimulon kag kapigosan sang malapad nga masa sang pumuluyo, labina sa bahin sang masa nga anakbalhas, kag ang kagilayonan sang ginakinahanglan nga resolusyon sa mga ini.

---

# Ang padayon nga pagkapyerde sang kampong Estrada, pagpabilin nga paandam sini, labi nga pagsingki sang bangiayanay sa kubay sang mga reaksyunaryo

---

**K**adalag-an pangunahon sang nagragasa nga kahublagan nga masa kag pag-alsa sadtong Pebrero ang pagpahalin sa rehimeng Estrada. Kadalag-an man sang kahublagan nga masa ang pagkadakop kay Estrada kag mga mayor niya nga kahimbon. Matapos ang nauna nga pagpangduhaduha, ginpatuman ini sang rehimeng Macapagal-Arroyo sa lubos nga pagpanagil-ot sang mga rebolusyonaryo kag progresibong pwersa kag pumuluyo.

Ang kadalag-an sa pag-inagaway nila sang kampong Estrada sa poder sini nga Mayo 1 angkon sa partikular sang rehimeng Macapagal-Arroyo. Bisan man, may responsibilidad man ang rehimen sa pagtuga sang sitwasyon nga nagtulod sang kagamo nga ini.

Nangin posible ang pagtinguha nga liwat nga pag-agaw sa poder bunga sang malaba nga tion sang pagpaduha-duha kag pag-atras-abanse sang rehimeng Macapagal-Arroyo sa pagpasaka sang kaso kag pag-aresto kay Estrada kag mga kahimbon niya. Sa subong sadto, nangin halog ang kahimtangan agud makapreparar ang kampong Estrada, makamaniobra kag makapagtipon sang mga pwersa kag rekurso. Kadungan, tayuyon ang lain-lain nga ligal kag paidalom nga maniobra nanday Estrada agud

harangon ang bista sa ila kag piliton ang nakapungko nga rehimen nga magpakigkompromiso.

Ang pag-aresto kanday Estrada naghangkat sa mga pwersa nga maka-Estrada agud gilayon nga hiwaton ang plano nga makahas nga agawon ang poder kag tukuron ang isa ka *military* ukon *civilian-military junta*, kundi man ibalik si Estrada sa pagkapresidente. Nagkumbinar ini sa minimum nga katuyuan nga makapuga sang paborable nga mga konsesyon halin sa isa ka nadestabilisa nga rehimen bag-o ang eleksyon. Sa sulod sang pila ka adlaw, nag-ula sila sang pila ka bilyong piso para sa hangyo nga ini.

Bahin sini ang paglunsar sang kudeta paagi sa mga kapot pa kag ginasaligan nga maganyat nila nga pinuno kag pwersa sang PNP kag AFP. Pangunahon na diri ang mga kapot pa ni Gen. Panfilo Lacson sa PNP kag ang mga kapot pa ni Col. Gregorio Honasan nga bahin sang RAM-Guardians. Kadungan man sang plano ang pagpaon sang mga natipon nila nga masa sa EDSA agud magserbi nga *battering ram* sa atake sa Malakanyang kag pamaon sa madugo nga pagpangsalakay sa rehimen.

Pero kinapos ang natipon nila nga armado nga pwersa. Gingamit ang pangsoburno agud kumbinsihon ang mga nagapamuno

**Kadalag-an man sang kahublagan nga masa ang pagkadakop kay Estrada kag mga mayor niya nga kahimbon. Matapos ang nauna nga pagpangduhaduha, ginpatuman ini sang rehimeng Macapagal-Arroyo sa lubos nga pagpanagil-ot sang mga rebolusyonaryo kag progresibong pwersa kag pumuluyo.**

**Nangin posible ang pagtinguha nga liwat nga pag-agaw sa poder bunga sang malaba nga tion sang pagduha-duha kag pag-atras -abanse sang rehimeng Macapagal-Arroyo sa pagpasaka sang kaso kag pag-aresto kay Estrada kag mga kahimbon niya.**

nga militar kag pulis nga nagauyat sang mga kumand nga magbaliskad, nga siya man ang isa ka kabangdanan sang pagsungaw sang plano. Temprano nga napanilagan sang rehimen ang mga tawo kag hulag sa likod sang plano nga kudeta kag nakahimo ini sang mga pagpreparar kag tikang agud paslawon ini. Subong man, sa bisperas sang pagsalakay sa Malakanyang, kabaylo sang mga konsesyon nagganyat man sang rehimeng Macapagal-Arroyo ang Iglesia Ni Cristo kag El Shaddai nga limitahan ang pagbulig sa kampong Estrada kag sa plano nga destabilisasyon.

Nasugpo ang atake sa Malakanyang paagi sa superyor nga armas kag kontra-atake sang militar kag pulis. Ang mga nagapanguna sa atake kinasuhan sang rebelyon, pagpakighimbunanay para sa rebelyon kag sedisyon; may mga ginpriso kag atong mga nagtago gindeklara nga mga pugante.

Ang napaslawan nga kudeta kag atake sa Malakanyang desperado nga tikang sang kampong Estrada bunga sang sunud-sunod kag malapit pa nga kapin nga pagkapyerde sa pagpakigtuos sa nakapungko nga rehimen. Masaligan nga dugang pa nga mangin makahas ang mga bungguanay nga ini sa maabot nga tion labina kag padayon nga nagabaskog ang panawagan kag paghimakas sang pumuluyo agud silutan sanday Estrada.

Grabe nga bunal ang ginagom sang kampong Estrada sa paslaw nga pagsalakay nila sa Malakanyang. Labi nga nagbaskog ang kamot sang grupo nga Macapagal-Arroyo batuk sa

kampong Estrada. Ginahimuslan niya ini subong agud labi nga ilampaso ang kampong Estrada, pat-uron nga magadaog sa maabot nga eleksyon kag konsolidahon ang kaugalingon nga pwersa.

Kadungan sang pagsugpo sa mga pwersa nga maka-Estrada ang pagadeklara sang *state of rebellion* sa Metro Manila. Ginhimo ang mga mapangsugpo nga tikang, upod ang pag-aresto sang wala sang *warrant*, pagtukod sang mga tsekpoyn, pagsona sa mga imol nga komunidad kag pagdumili sang ano man nga aksyong masa sa tupad sang Malakanyang. Ginako ni Macapagal-Arroyo nga ang gindeklara niya nga *state of rebellion* sa Metro Manila pwede maglab-ot direkta nga deklarasyon sang layi militar kon indi pa maguntat ang sitwasyon. Sini nga Mayo 7, ginbawi man sang rehimen ang deklarasyon sang *state of rebellion* sang maseguro nga ara sa kontrol na sini ang mga pangdestabilisang hulag sang mga pwersa nga maka-Estrada.

Kadungan sini, ginhimo sang rehimeng Macapagal Arroyo ang mga likom nga negosasyon sa Iglesia ni Cristo, sa El Shaddai kag mismo nga kay Estrada bag-o kag pagkatapos sang Mayo 1 sa pagtinguha nga ihamulag ang mga lider sang planong pag-agaw sa poder.

Indi pa naresolba sang temporaryo nga pagkapyerde sang kampong Estrada ang pag-singki sang bangiayanay sa kubay sang mga reaksyunaryo. Ubus-ubos ang gintaya sang kampong Estrada sa pangbato nila nga si Estrada. Gani ginahimo nila ang tanan agud balabagan ang bista kag

pagsilot kay Estrada kag iban pa nga ginpasakaan sang mga kaso. Sa pihak nga bahin, ginahimo sang subong nga rehimen ang mga tikang nga nagasabat sa mabaskog kag lapnagon nga panawagang silutan sanday Estrada; kadungan na man sang handom nila nga bug-uson ang kontrol sa poder, pribilehiyo kag benepisyo.

Indi untatan sang grupo nga Estrada ang nakapungko nga rehimen. Subong labi ini nga natulod sa kalakasan. Daku pa ang reserba nga ikasarang sang kampong Estrada kag padayon nga maghimo ini sang mga plano kag pamaagi kag magbubo sang pwersa kag rekursu agud makabawi kag makabalik sa poder. Liwat ini nga magtipon sang pwersa kag maghulat sang husto nga tion kag tyempo. Magapadayon kag pwede nga magbulwak liwat sa makahas nga bakbakan ang kampong Estrada kag kampong Macapagal-Arroyo.

Sa subong sini nga kahimtangan, padayon ang dungan nga pagpatuman sang rehimen sang paggamit sang kamot nga salsalon kag pagpakigkompromiso kanday Estrada agud manyutralisa kon indi man padayon nga makuha ang peligro halin sa kubay nila. Kinahanglan ang padayon nga pagbantay sa iban pa nga pagpakig areglo kag akomodasyon nga pwede himuon sang rehimen sa kampong Estrada.

**L**abi nga maayo para sa pag-abanse sang rebolusyon ang ginlab-ot subong nga dugang nga kabug-aton sang kontradiksyon sa kubay sang mga reaksyunaryo kag lubos nga kagamo sang kabilugan sang reaksyunaryo nga sistema nga pangpulitika sa pungsod. Sa atubang sang subong sini nga kahimtangan, labi naton nga pabaskugon ang mga pwersa sang rebolusyon kag paluyahon

ang kaaway paagi sa pagpabakud sang rebolusyonaryo nga hulag kag nagahiliugyon nga prente, pagdugang sang atake naton sa kaaway kag pagpasingki pa sa ila mga banggianay, kadungan sang pag-abanse sang mga paghimakas nga masa kag armado nga paghimakas.

Samtang nga indi kita nagabahar sa pagpamatuk sa mga padihot sang kampong Estrada, kinahanglan nga padayon naton nga pamatukan sa kabilugan ang nagahari nga reaksyunaryo nga estado kag sistema kag ang mga kontra-rebolusyunaryo kag kontra-pumuluyo nga polisa kag hilikuton sang nagahari nga rehimen. Kinahanglan nga maayo nga pagkumbinahon ang aktibo nga pagpanguna sa mga kampanya, alyansa kag aktibidad agud sukton si Estrada kag mga kahimbon niya sa mga kriminal nila nga salabton; sakdagon ang mga matarung nga kalisud kag paghimakas sang masa; kag magpalapad kag magpabaskog sang nagahiliugyon nga prente sa magka-upod nga pag-abanse sang mga katuyuan nga ini.

Kaisa naton sa subong ang madamo nga kontra-Estradang pangpulitika nga pwersa kag huyog sa bato agud balabagan nga makabalik sa poder ang kampong Estrada, kag sa pasukot para sa mga kriminal nga salabton sini. Tubtob sa isa ka lebel, maisip diri ang kampong Macapagal-Arroyo.

Bisan man, kinahanglan nga likawan naton nga mabuslo ukon mabitag sa burges repormistang bala-yon sang “pagsuporta sa gubyernong Macapagal-Arroyo agud ipreserba ang mga kadalag-an sang EDSA 2”, “pagsugot sa deklarasyon sang *state of rebellion* agud pangapinan ang layi kag kaayuhan”, kag mga kasubong sini.

**Samtang nga  
indi kita  
nagabahar sa  
pagpamatuk sa  
mga padihot  
sang kampong  
Estrada,  
kinahanglan nga  
padayon naton  
nga pamatukan  
sa kabilugan  
ang nagahari  
nga  
reaksyunaryo  
nga estado kag  
sistema kag ang  
mga kontra-  
rebolusyunaryo  
kag kontra-  
pumuluyo nga  
polisa kag  
hilikuton sang  
nagahari nga  
rehimen.**

Kinahanglan nga tayuyon nga kaptan ang basehan nga halambalan nga ang rehimeng Macapagal-Arroyo ang papet nga tagapangtatap sang reaksyunaryo nga estado kag pangunahon nga instrumento subong sa pagpanghimulos, pagpaantos kag pagpamigos sang imperyalismo kag lokal nga mga reaksyunaryo sa pumuluyo nga Pilipino.

Sa subong, bangud wala sang signipikanteng mga konsesyon nga ginahatag ang rehimeng Macapagal-Arroyo agud itib-ong ang palangabuhian sang pumuluyo,

wala sang nagaluntad nga bastante nga kabangdanan kag mapuslanon nga basehan agud itrato ini bilang taktikal nga alyado. Samtang, nagapadayon ang grabe nga bangi-ayanay sa kubay sang mga reaksyunaryo, ang indi pa tapos nga bato naton sa grupo nga Estrada, ang bato man naton subong sa nagahari nga rehimen, kag ang labi pa nga pag-abanse sa kabilugan sang paghimakas nga banwa. Pwede pa nga maglab-ot ang mga ini sa lain-lain nga porma kag direksyon.

---

## Pagtampok sang problema sa kaimulon kag kapigosan sang masa nga anakbalhas kag ang singgit nga kinahanglanon nga gilayon sang atubangon kag resolbahon ini

---

**A**ng mga natiplang kag ginbuyo sang kampong Estrada sa pag-atake sa Malakanyang ang siya nga nakakuha sang mga bunal halin sa kontra-atake sang mga militar kag pulis. Samtang ginabuyo sa atake ang mga pwersa nila, naghalin sa eksena ang mga nagapanguna sang salakay sa Malakanyang agud luwason ang mga kaugalingon, sumilong sa kasulhayang sang ila nga puluy-an kag maghugas-kamot sa ila pangunahon nga responsibilidad sa hitabo.

Para sa ila pagtinguha nga agawon ang reaksyunaryo nga poder, gingamit sang kampong Estrada nga pangbala sa kanyon ang daku-dako nga bilang halin sa natipon nila nga pwersa sa EDSA. Ang pinakamatig-a kag pinakadaku nga bahin sang mga ini mga sumulunod, mga baydan kag lumpen nga hinakot sang mga pulitiko nga maka-Estrada.

Natiplang kag namobilisa sang mga pulitiko nga ini ang daku nga isip sang imol sa syudad

kag iban pa nga malaproletaryado sa syudad kag kaumhan paagi sa pagpangmudmod sang kwarta kag paggamit sang “maka-imol” nga demagohiya, luwas sa iban pa nga pangganyat. Si Estrada kuno nagatiglawas sa masa nga nagaimol. Nagapanawagan siya kag ang mga pulitiko nga maka Estrada sang “inaway sang mga imol batuk sa manggaranon”, samtang nga upod sila sa mga pinakadalagku nga burukrata kapitalista kag burges kumprador. Ang mga natiplang nila naga-agi sang grabe nga kaimulon kag kapigosan, samtang nagapangabuhi-hari kag nagapagusto naman si Estrada, mga pamilya kag kroni niya sa dalagkuan nga pagpangawat kag pagpangawat sang bilyun-bilyong piso halin sa pumuluyo kag sa kaban sang banwa.

Ang malaparan nga pagpangtiplang nga nahimo sang kampong Estrada sa mga imol kag ang daku nga isip sang mga napahulag halin sa kubay nila para sa pagtinguha nga pukanon ang gubyernong Macapagal-Arroyo patimaan sang nalab-ot nga



grabe sang krisis pangpalangabuhian, labina para sa masa nga anakbalhas. Malala ang ila akig sa gin-agihan nga gutom kag kaimulon; kag grabe ang handom nga makabutwa gikan diri. Ginwarik ini sang kampong Estrada sa “manggaranon sa Makati nga ara sa likod ni Macapagal-Arroyo” agud gatungan ang malain nga padihot sini nga makabalik sa poder.

Malisyoso nga gin-angkon sang kampong Estrada ang papel bilang tagapagdala sang “inaway nga makisahi”. Gintiku ang kahulugan sini agud paburonon ang esensyal nga rebolusyonaryo nga kaundan kag pagserbihon ini sa ila nga reaksyunaryo nga katuyuan. Ginlapta ang bulag nga akig sa sin-o man nga ginakabig nga “elitista” upod ang petiburgesya nga nagaagi man sang pagpamigos sa idalum sang subong nga sistema. Kinahanglan nga ipaathag sang mga rebolusyonaryo nga pwersa ang kahulugan sang “inaway nga makisahi” paagi sa pagpakita sang obhetibo nga alinyaranay sang mga sahi nga ginapigos kag sang nagapangpigos sa idalum sang subong nga sistema nga pangkatilingban; kag ang katungdanan nga pag-isahon ang tanan nga pigos batuk sa imperyalismo kag mga reaksyunaryo nga nagahari nga sahi.

Ang kalaparon sang nahimo nga pagpangdaya ni Estrada nagahatag tum-ok kag kagilayonan sang katungdanan naton nga muklaton, organisahon kag pahulagon ang masa sang pumuluyo, labina ang basehan nga masa, para sa ila kaayohan kag sa rebolusyon. Kinahanglan nga hatagan tum-ok ang pagpanagil-ot sa mga kongkreto nga solusyon sa mga gilayon nga kalisud kag isyu sang masa nga anakbalhas, kasubong sang pagpataas sang sweldo sang

mga mamumugon, pag-abanse sang kontrapudyudal nga kahublagan nga masa sa kaumhan, pagsakdag sa interes sang mga imol sa syudad kag iban pa kag sa mga mapuslanon nga pagbag-o nga makasabat sa imol nga kahimtangan kag grabe nga kinahanglanon sang imol nga pumuluyo. Kadungan sini, kinahanglan nga maipakita sa masa sang pumuluyo nga matuod kag pangmalawigan nga solusyon sa mga problema nila ara sa hulag nila agud makabutwa ang kaugalingon kag ang ila sahi kag sa pagtingob sang mga kalisud kag interes nila sa rebolusyonaryo nga kawsa kag hulag.

Ang madasig nga kumpas subong sang mga mapuslanon nga hitabo, ang pagtalom sang mga isyu nga pangkatilingban, ang kapagsik sang pumuluyo sa pagtipon, pagpahayag sang mga kalisud kag paghandom sang mga solusyon sa mga isyu nga ini lunsay basehan para sa daku nga pag-abanse sang rebolusyon. Nagapangita ang pumuluyo sang desaysibo nga solusyon sa ila mga basehan nga palaligban, nga indi ginresolba sang EDSA 1 kag EDSA 2 kag labina sang wala unod nga islogang “Erap para sa imol “ sang ginhingadlan nga EDSA 3.

Kinahanglan nga maigokag mahimuslan sang mga rebolusyonaryo kag progresibong pwersa ang subong sini nga kahimtangan kag tayuyon nga papagsikon ang demokratiko nga kahublagan nga masa nahanungod sa mga gilayon kag basehan nga isyu nga pangkatilingban. Sa subong, maagom sang kahublagan nga masa ang mas mapuslanon nga mga kadalag-an kag kapuslanan nga indi masarangan labuton sang bisan pila ka pag-alsa sa EDSA. <sup>AB</sup>

**Ang madasig  
nga kumpas  
subong sang  
mga  
mapuslanon  
nga hitabo, ang  
pagtalom sang  
mga isyu nga  
pangkatiling-  
ban, ang  
kapagsik sang  
pumuluyo sa  
pagtipon,  
pagpahayag  
sang mga  
kalisud kag  
paghandom  
sang mga  
solusyon sa  
mga isyu nga  
ini lunsay  
basehan para  
sa daku nga  
pag-abanse  
sang  
rebolusyon.**